



Komunikadu Imprensa
02 Marsu 2022
Parlamentu Nasionál

JSMP husu ba deputadu Parlamentu Nasionál atu la revoga Lei Nú. 07/2009 kona-ba Kria Funsau Públiku maibé adapta tan norma balun ne'ebé seidauk regula iha lei ne'e

Parlamentu Nasionál, iha 23-24 Feveireiru 2022, hahú hala'o diskusaun no votasaun iha espezialidade ba Proposta Lei Nú.34/V (3ª) Lei Komisaun Funsau Públiku ne'ebé Governu VIII propoin hodi revoga lei ezistente nu'udar parte ida husi programa reforma administrativa ne'ebé submete mai Parlamentu Nasionál iha 24 Agostu 2021.

Intensaun husi proposta lei ida ne'e mak atu promove imparcialidade, insensaun no profesionalizamu iha funsau públiku ne'ebé iha nia ámbitu aplikasaun sei sujeita ba iha funsionáriu públiku, ajente traballadór administrasaun públika.

Governu mós muda kompeténsia balun ne'ebé tuir lei ezistente nian kabe ba iha kompeténsia Parlamentu Nasionál hanesan apresentasaun relatóriu anuál Komisaun Funsau Públika nian, maibé iha proposta atual muda fali kompeténsia ne'e ba iha Governu, nune'e mós kona-ba nomeasaun ba komisáriu sira Komisaun Funsau Públiku ne'ebé antes ne'e kabe ba kompeténsia Parlamentu Nasionál maibé iha proposta atual fó totalmente kompeténsia ba Governu hodi halo nomeasaun ne'ebé ho proposta mai husi Primeiru-Ministru.

“JSMP hanoin la nesesáriu atu halo lei foun hodi revoga lei ezistente no sujere atu mantein. Governu presiza halo de'it alterasaun hodi atualiza artigu balun ne'ebé presija ajusta hodi bele adapta ho evolusaun administrasaun públiku iha mundu. Adaptasaun ne'e, liuliu ligadu ho independénsia ka imparcialidade, profesionalizmu, isensaun, transparánsia no inkluzau hodi bele aseguira prestasaun serbisu ne'ebé ho qualidade no efetivu ba Estadu,” *dehan diretora JSMP, Ana Paula Marçal.*

JSMP hanoin Komisaun Funsau Públika tenke mantein nia independénsia nu'udar órgaun autonoma administrativa, finanseira no téknika ne'ebé subtutela ba Primeiru-Ministru nu'udar xefe Governu.

JSMP rekomenda mós atu deputadu sira karik hanoin atu halo alterasaun ba lei ne'e, bele hadi'a mós provizaun Artigu 8 kona-ba kompozisaun ba komisáriu nian. JSMP sujere atu número komisáriu bele hamenus ba na'in 3 husi na'in 5 ho ninia rekejitu sira hanesan haktuir ona iha lei ezistencia : iha koñesimentu no abilidade iha área política públika, Jestun no Administrasaun Públika na'in ida, área direitu na'in ida no área relasaun industria no empregu na'in ida.

Alende ne'e mós, JSMP husu atu estabelese rekezitu balun iha provizaun alinea c) Artigu 9 kona-ba kondisaun sira ba nomeasaun komisáriu Komisaun Funsau Públiku iha ne'ebé bele fixa mós rekezitu kona-ba tinan esperiénsia serbisu iha área sira ne'ebé mensiona iha leten

mazumenus tinan 10 no iha mós pontu 2) kona-ba la lezível atu sai komisáriu ba iha Komisaun Funsau Públiku*, JSMP sujere atu bandu mós F-FDTL no PNTL.

Atu hetan infomasaun kompletu bele kontaktu :

Ana Paula Marçal

Diretora Ezekutiva JSMP

Email: ana@jsmp.tl

website: <https://jsmp.tl/>

*La lezível atu sai komisáriu : Prezidente Repúblika, membru sira Parlamentu Nasionál, membru sira Governu, majistradu sira judisiáriu, majistradu sira Ministériu Públiku ne'ebé ativu, kandidatu sira ne'ebé eleitu ona ba pozisaun ruma, funsionáriu públiku no dirijente sira husi partisu polítiku.

Rua Beco Lakateu, Aldeia Manufuik,
Suku Colmera, Administrativu Vera Cruz

Dili Timor Leste

PoBox: 275

Telefone: 3323883 | 77040735

www.jsmp.tl

ana@jsmp.tl

Facebook: www.facebook.com/timorleste.jsmp

Twitter: @JSMPtl